

田

亭

草

資政大夫南京兵部尚書贈太子少保

公墓誌銘

南京兵部尚書連江容所吳公以萬曆己丑致其事
歸時公年未及也海內大夫士咸覩其出處爲世道
重輕越癸巳上篤念耆德起公南京工部公疏辭
者四乃獲命懸車後優游里居者凡十載而考終
于正寢時萬曆戊戌九月十一日也兩臺使者疏聞
于朝上允部臣議賜祭如例有加焉遣中書舍人
來敦葬事贈公太子少保惟易名之典行臺使者覆
覈具聞蓋有待云公子太學生承照等將奉公葬于

邑寶溪山之陽而次君承熙如哀跋涉持少宗伯葉
先生所爲狀謁黃生清源山中曰以先子之託知先
生也敢乞言於墓中之石黃生愧蕪陋無能爲後顧
素景慕公其何敢辭廼按狀志之曰公諱文華字子
彬嘉靖乙卯薦于鄉丙辰成進士守次銓部當授北
曹郎以將母便養丐南爲南京兵部主事稍遷郎中
癸亥晉湖廣提學僉事乙丑晉四川叅議明年晉廣
西提學副使居三載晉山東叅政踰年晉按察使仍
山東又居三載晉江西右布政使尋徙左河南乙亥
晉應天府尹旋晉右副都御史巡撫廣西滿考晉戶

部右侍郎以太夫人春秋高乞侍養歸踰載宅太夫人憂服除久之起兵部右侍郎兼右僉都御史巡撫廣西如故其年改刑部右侍郎徙左需代未行晉右都御史總督兩廣又滿考晉南京工部尚書越歲改南京兵部公所歷官皆積資累闕躡級而登不借援於權近轍跡半寓內未嘗得一朝在日月之際而筮仕之丐南少司農之歸養又皆引而自遠焉其數業最著且久者獨在兩粵紆徐裴徊閱三十二載乃始正八座於陪京曾無何而飄然勇退矣當公爲曹郎時適三殿營建內璫主進顏料牒所司具舟三百艘

公裁其大半璫盛怒脅以危言公徐應之曰上供舟
豈爲市販地耶有 祖宗功令在不知各將誰執璫
爲氣奪遂巡罷是後凡進奉舟皆廩廩守約束景藩
之國道留都復當具舟藩邸從人橫甚郵傳苦之時
公已改督草場而上下咸委重公公董役事事治辦
間謁王傳請毋以群小爲賢王累傳唯唯泊一夕去
無譁者草場多營卒佃種卒驕恣欲縮其賦額主計
者懲前變輒爲奏減報可矣公得檄持不下曰此其
地昔瘠而今腴昔乾沒而今受賦賦額舊矣何可更
且此曹何厭之有主計者不能從末幾云公從史代

堵䟽請如舊制廼已公臨事疑峻暇則鍵戶讀書謝一切交遊徵逐吳主事之名籍甚南中矣既擢視楚學屬試期逼公疾走列郡晝夜校閱所評隲錙銖不爽諸經獎借而成名者甚衆端模楷杜請寄楚人士咸慶得師至其視粵西學也一如楚今兩地人稱賢學使必嘖嘖吳先生云滇叛酋鳳繼祖竄入蜀界兩省合誅之連歲弗得比公以叅藩至杖鉞者用公籌策事廼平土酋世官積爲獵賄者所格有司復引嫌置不問天全六番招討副使楊時譽用是仇其使高定日尋於兵邊圉騷然公貽誠二酋咸悔懼因代時

譽請俾世其爵邊釁由此遂解其在山東江西也督
儲清戎課吏折獄釐正賦役所厝施人人稱便甲戌
大計群吏天子脩曠典旌治行異等者二十有五
人公爲之冠時公已徙官矣璽書金幣下大梁輿論
快之大梁故窘藩祿公爲酌盈虛嚴出納禁羨耗宿
負盡輸諸宗次第就給先是詔祀革除死事諸臣有
司寢未舉公懷然曰此 聖主褒忠德意也胡可緩
檢汴志得鐵公鉉等五人祠祀之又勅所司修太昊
陵濬復南陽水利它興革甚夥皆關風化民瘼匪取
飾觀聽已爾去汴之日宗藩及士民扶携追送者數

百里相隨屬粵西雜夷而治公曩所宦游處利病在
目中矣公開府時方苦旱民困艱食公䟽請賑恤不
待報已先發倉庾仍告糴隣省給散倣常平法是歲
飢而不害已乃募墾荒均徭賦蒐卒乘䟽設昭平縣
建養利州學割武緣縣屬思恩移兵備于鬱林增河
池同知種種石畫迄于今利賴焉六平寨徭猺突內
地公檄叅政陳應春討定之昭平賊酋黎福庄嘯聚
流剽聞公至佯自斂戢公亦爲弗聞者會方剿羅旁
兵盡東公陰留覲士三千屬裨將韓文啓掩擊之斬
福庄疾攻下五指白冒諸峒俘馘外所撫定凡二萬

餘人即其地建堡墾田集新附及諸戍兵而柳州賊巢北三者怙衆負嶮跳梁久諸將莫敢嬰公策之曰兵法不動如山動如雷震時固有待耳適有河池布咳之役公謂叅將王瑞倪化中足伏也畀卒七千餘以往捷書聞即陰勒部署曰吾意在北三今賊不我虞可乘矣遂督兵分道進賊果不爲備連破七十餘巢斬四千八百級俘獲稱是是捷也役不再藉因糧于寇不浹月而蕩累世之窟穴山菁巖藪之孽孽公威名惴惴屏伏矣故其再起撫粵也湘源熟徭苦催科相煽動公檄諭之遂定田州酋岑大祿與其母梁

氏忤梁憤自徙避隣酋圖披其地將聲罪而兵之公
曰此亂階也亟令大祿迎母歸爲母子如初兵端乃
寢說者謂樽俎屈人公其有焉二廣雄鎮廷議謂非
公不可 天子藉公重晉秩總督之公忻然曰 君

命天也東西南北敢不惟命是從哉既蒞鎮即簡行
伍會經費自軍市租及常賦以奉戰士其它權稅夷
舶所入付有司勾稽幕府一無所預又斥其贏代保
昌浮糧八十石民籍以甦轅門持戟之士悉汰諸空
名者核其餉歸諸官其存者以隸裨將訓習宿弊灑
然悉除每山海告警遣將出師輒授以成畫若按圖

聚米省括張機動罔不效如營兵鼓亂於平樂獮猺
猖獗於府江倭奴流突於海上懷集劇寇嚴秀珠掠
封川諸邑瓊州叛黎羅旁殘孽公應機揃平之諸所
獲功無算又捕祆徒劉青山珠盜陳鏡等弛其餘黨
不治又襲惠州岑洞擒渠盜江月照覆其巢即王文
成所招撫羈縻迄今爲梗者公一舉而克之蕩如也
先後在粵中以軍功賜金幣者九進俸者一錄子爲
太學生者二公雖閒將畧善用兵顧恒主以撫綏歷
以持重鎮城嘗苦淫雨廬舍漂沒民號呼水中公親
乘城集急舸渡之捐庾穀哺被災者復請留贖鍰七

有集馬廣州主客

應 但情 公 為 重 弟 移 鎮 會 城 日

戎 口 賞 遣 如 令 一 捕 海 上 謀 一 人 磔 以 殉 內

帖 息 其 半 及 訖 則 所 撫 納 縱 舍 為 多 以 故

手 顧 公 追 為 祠 以 祀 焉 留 都 根 十

兵 悍 且 脆 不 曾 太 湖 盜 起 公 疏 陳 保 諸

郎 議 執 乃 畢 力 振 刷 間 以 便 宜 從 事 於 且

侵 侵 改 觀 天 策 衛 卒 以 儲 饒 浥 腐 蠹 均

有 以 為 不 一 問 公 徐 召 司 庾 諸 役 及 首 事

狀 而 先 要 諸 役 曰 卒 寄 命 于 食 典 守 弗 恤

所

金

日

年

王

事

公

所

金

所

罪叱杖之平甫伏謝公復數卒曰司度老
書胡不白之官而遽譴爲軍令譴者死爾
時頴祈哀公曰姑薄懲若亦叱杖之從
人賈寬我通相戒勿復有所犯公應變言
中璫有怙權恣睢者爲言官所糾 上

平南尤觚抗言宜治璫罪宥言者語其切至
頃之引疾乞休或謂公宜少留乎公答曰僕
自狗馬病豈敢效小人悻悻去哉連三疏益
上乃許之仍命痊日守臣以聞然公已爲終臣
公性資和粹器度沉弘廉不近名功不伐伐

施於人不自爲德在汴所積羨金萬餘主藏史私具籍進請內諸行李不則牘而白之臺使公不應第藉授代者充公帑而已兩粵幕府故事郡邑吏獻遺上壽歲時不絕公嚴爲禁遏又前後所節縮積金至十九萬有奇或有問公者公亦噤不答此三之捷本兵偉其功擬策勲告廟而督府某者爲權相私人啻計畫不預聞陰間之權相竟薄其賞公終不自言也家居謝絕賓客蕭然一室即邑令不獲覲其面親朋有所祈請不爲輕貽片刺惟時時推餘貲佐其長貧者嘗買田百餘畝給弟子負建邑東浮圖以完風氣助

常平淡河渠修橋梁諸皆竭蹶爲之邑諸生某失令
意令尋端重搆之罪衆憤其枉賴公乃得白有舉
經者耄矣學使者欲奪其餼公憐而拯之皆不令其
人得知公爲德於冥冥多此類沒之日縉紳嗟悼里
黨奔赴慟哭庠諸士今請祀公學宮蓋公之遺德遠
矣公生平寡嗜好獨雅好詩歌書法最得晉唐人風
趣所著有督府奏議留都疏稿濟美堂集藏于家公
生正德辛巳七月初八日距其卒之年春秋七十有
八先世自光州固始入閩居岳山始祖贊爲施州守
再傳士興徙連江士興數傳至太平訓道寅訓導生

處士公瑄處士生廣西按察司副使公世澤即公父也公以右都御史秩滿贈祖父父如其官而祖母某氏母陳氏皆贈夫人配王氏御史德溢公女早逝贈夫人繼陳氏封夫人子男三承照承熙承烈皆以蔭叙爲太學生孫男六公葬以某年某月某日銘曰國有耆碩鄉有老成重如鼎呂尊爲典刑顯允吳公庶士攸程瑋矣其實不朽者名公之宏才經文緯武造士作人棧樸楚楚撫綏戡定山海按堵周邦爲憲曰維吉甫公之志行儻然不欺廉開霧翳清畏人知截截矩矱肅肅繩規白璧精鏐卓哉匪夷公之進退馳

驅範軌牙立靡什蔓附爲耻介石既豫綸徵不起奚
構綠野願從黃綺公之里居衡泌徜徉一塵不緇千
頃汪汪好行其德樹義于鄉干旄式閭月旦餘芳旂
常銘勲盤杼銘德公其兼之永爲世則勒此銘詞閔
于兆域茂櫝崇墳流聲罔極

山西行太僕寺少卿龍源黃公墓誌銘

龍源黃公泉之南安人舉嘉靖己未進士授行人秩滿選貴州道監察御史積資望五載出守黃州居黃幾兩載遷陝西苑馬寺少卿尋解職歸里居數門者久矣以論定出爲山西行太僕寺少卿無何屬計吏公獨由內批報罷時爲萬曆丁丑云自是優游巖藪凡二十餘載而卒公性資凝重平居不露喜愠其當官肩事屹然如岳時弗搖也爲御史按遼左嗣按真定蓋當嘉靖之季時朝政翫愒諸邊帥沿襲欺誣近畿中官豪俠憑城社爲百姓豺狼直指使按部大舉

通關說顧望權貴人意指已耳公目擊心憤舊矣抵
遼陽則糾撫臣之侵沒軍饟者飭吏士增堡置障竟
用創 先是 嘗入犯所衝頽邊堞千餘丈事聞
肅皇帝怒下吏議而邊臣謬上功兵部冒賞格公奮
然抗疏其畧曰古云百聞不如一見今邊堞崩頽
蹂躪內地臣行邊時所目覩也乃債帥樞部交相蒙
冒反用逃譴徼賞誠所謂一指蔽目不見泰山請按
諸欺罔者以法疏入中外慄然憚之三輔故開權本
場中官與郡幕董其稅率漁獵諸商自肥公一切裁
罷有貴人子橫暴州邑吏不敢問民詣臺陳牒者衆

公廉其事皆有跡收繫獄中當道力爲營解公嘆曰
夫原褚伏法穉季穴門豈衣繡持斧者乃不逮一守
尹哉力持之不少貸凡公所糾繩彈壓皆肅然攬轡
埋輪意而士人乘間齟齬公遂用外轉矣黃人聞公
名咸廩廩惕息公下車則問民疾苦治務在長厚而
已郡民苦冊籍影射公精覈得漏糧千餘緡始以見
糧差賦額高下民便之遂著爲令猾胥持獄訟爲姦
利往往拘對連殫至竟歲月公一訊立剖既得情又
早遣去於是歌咏載道其諸興利除害綏輯撫摩藹
有循良風而是皆楚相棟政宦楚中者率適相介紹

以求蔓附公視之蔑如也乃忘者復尋端批根猶用
前事中公竟假手權相爲怨家釋憾云公事二親孝
母歿則代父撫育諸弟妹爲畢婚娶已盡東先世遺
賢與諸弟而嫁娶其子女若而人家世族齒蕃衍公
修譜牒創宗祠增拓祀田以追崇始祖即族人婚娶
喪葬咸取給焉族有富而無子者宛以爭繼構訟願
丐公子爲嗣公拒以非次而爲之擇所宜繼白諸官
闕闢者自是斂手其居鄉務尚義施德不以貴勢自
炫所居距邑治四十里會島夷寇閩中公輒捐金倡
衆築塢于要害處地寇至民賴以收保迄今頌之御

史時過家有司請爲樹綽楔公固辭曰寇難甫靖瘡痍未蘓誠不忍以區區浮名煩吾父老子弟有司爲之愧寢跡公之修于家內外踈戚靡弗人人感慕公者乃其涉仕途一何齟齬而卒以不容於世也嗟乎不容何病不容然後見君子矣余與公結吟社公常衣大布衣乘一肩輿至也素善飲飲不至醉即醉不及亂其爲詩風格稟諸魏晉藻麗裁諸盛唐洋洋有足諷者居恒左右圖史所著有四書易經集說藏于家課諸子各受一經自賓朋過從外悉屏謝公間請謁蓋公之冲寂如此公諱襄字國著其先自光州固

始避亂入閩世居于郡城西唐垂拱間有守恭公者以宅施僧爲紫雲寺而分諸子于支邑其自南安後山徙馬林者始祖曰漢卿四傳福進福進生廷璧廷璧生欽欽生澤澤生釣溪公柯是爲公父比公貴而贈釣溪公爲御史母楊氏贈孺人公今又徙城西以居古所謂必復其始矣待公侯乎公享壽七十有二配李氏繼配沈氏贈封皆孺人均賢而克相公者子男五女四孫男九先是公治塋于其邑二十三都石闔山之原手狀李孺人而爲之銘將葬焉未果也今公子培禎等卜以萬曆庚子年三月十七日奉公及

率孺人同藏而持司寇咫亭詹先生狀來謁銘於余
余烏得辭銘曰矯矯臺史風猷蹇蹇人避驄馬朝爾
白簡汲黯淮陽望之平原暫奉一麾非久旋轅吁嗟
公乎一出不返復中萋菲終老林晚厥施未究用恢
燕貽箕裘既紹式穀似之崇岡樹檟撫原藏壁券琰
方來餘輝赫奕

通議大夫四川按察使洞齋張公墓碑銘

距郡城五十里岡阜蜿蜒平疇旋繞者曰晉邑方廣
山而其中隆然一丘佳氣鬱發是爲憲使洞齋張公
之墓公謝政家居日與其世父隱君梧所足涉而目
營者也公子武義令國裳等卜以萬曆甲辰閏九月
二十六日奉葬公而省元李君光縉狀之南少宰葉
公向高誌且銘之乃國裳等復以麗牲之石屬詞於
黃生鳳翔翔故公莫逆交也即朽劣奚敢辭公諱治
具字明遇先世自光州固始徙于漳累傳至安溪主
簿康家晉江筍江里康生惠惠生安安生成遠成遠

生儼儼生鑑鑑生浴江公堯有隱德贈中憲大夫江
西按察司副使娶贈恭人林氏生公公幼聰慧且端
凝負大器林恭人嘗携以歸寧舅侍御公潮見而奇
之曰是兒足徵吾宅相矣十二歲能通戴記尋徙治
尚書越舞象之三歲遂應省辟先後督學使者每試
輒首公公名益高顧其躋場屋日益甚甲子乃登鄉
薦至辛未成進士公美鬚髯儀觀豐偉望之儼然謁
選當爲令屬柄銓者重邊徼邑公得廣西之永淳永
淳人睹公而驚曰偉人也而辱臨荒壤乎公殊不鄙
夷其氓南視事即詢民瘼爲豁浮賦三百石有賈豎

賄當道者請鑿鑛公力爭之不能得則為設重稅俾
輸郡帑賈豎大窘皆遁去暇日進黌宮弟子教以文
藝旁近邑有望風至者自是登鄉薦不乏士益顧化
矣居閱歲移令臨海臨海多巨室公飲以和蒞以正
士大夫安之其聽斷頃刻數百言立就疊疊中窾兩
造為之縮舌邑賦繁重猾胥巧為弊數公分其都為
四掾各領之以次徵解民無逋賦吏不得侵漁署其
籍曰追徵全法考四封稱便郡丞王某者素陰鷙忌
公訾其法于中丞臺而御史故賢公且避公所著令
丞計阻公名乃更籍甚尋奉璽書徵入拜貴州道御

史巡視京通二倉兼河道已復巡銀庫巡西城兼視
十庫公蒞事舉大體不厭細劇事事治辦中貴人復
母敢干者御史大夫嘉公能請命公督新運而公奉
林恭人諱歸矣服除補湖廣道適扈蹕謁陵還過
老君宮上有徘徊意公倉卒具疏上請罷逸游以
光盛典上嘉納即趣歸時稱公有回天力焉已奉
命按南畿還朝復出按楚直指使行部奔走群吏主
養尊持重已耳公所至旌廉汰貪如別白黑而不借
人耳目所亟留意者卹下情鋤豪強慎聽讞有閭戶
習妖幻掠人子女爲市民遮道訴公駭曰畿輔乃有

此乎立遣吏窮其奸所出數百人溧陽史緹帥交驩
權相僕怙勢多爲不法公特疏按劾史雖藉輿援免
然時論咸稱快矣楚俗貧而自鬻者至奴于其族更
數世猶隸役如舊公特明倫法諭禁之俗稍稍革土
司相仇動輒指大逆爲械弄公曰此諛詞也其煽搆
不小下吏訊果如公言凡公所訊讞皆躬閱爰書衷
以情法文移山積批荅無滯諸從公按部者間承諮
詢而已居恒語人曰古人有云立身以正直忠厚爲
本吾儕當佩服斯言嘗監順天試主司先放榜日取
諸生手牘備校對沿爲故事公執弗與第按號彙次

以待隨取隨應無訛者論者謂公善持法主司勇於
善兩足多也後遂遵爲例行部荊州過故相廬爲之
咨嗟捐贖鍰存恤其老母曩構公者王郡丞楚人也
業已物故其子聞公來徙旁邑爲逃匿地公尉籍之
有加蓋公之正直忠厚多此類公積望久當內擢顧
中忌口遷江右臬副治贛州已復晉其省參政治饒
州贛苦徭徭爲梗素稔公威德弭耳晏如奸民挾養
砂術嘯聚幾亂公擒治之餘孽悉解散饒故淮藩封
又尚方陶器所出也公核宗祿以時給禁埏戶毋得
盜鬻有以陶器餽者拒弗受人咸頌且畏之督憲使

試饒饒諸生與郡推官爭事擁其署譁甚公曰此其
坊不可潰而勢不可激乃召諸生至明倫堂諭之曰
茲額也而曹得其解乎諸生唯唯謝去公一言重於
泰山矣已擢四川憲使會計吏江右撫臣追訾公謂
弛法於諸生且建昌宗室索歲祿闕于其門失居上
體知公者嘆曰公未嘗攝建昌也諸生自心服公繩
諸生非公職也然公已倦游遂不就調致政歸先是
公在蜀給事中紉蜀撫臣屬公勘實而語多風聞公
曰誣人以媚人匪吾素也竟上狀與劾章左播州民
苦楊酋虐避入內地時議驅出之公曰播人即吾人

外之何以明一統夫馭母太苛母太柔易之者禍
爲設法綏戢卒以安堵比公去人謂輕評公者寧無
愧公所爲厥後楊酋煽衆征討累年則又咸服公先
見云公操行嚴倫情篤自爲令至長憲入覲入賀不
以公私一錢爲道里資按三大都諸縉紳交際取具
禮耳不以厚餽爲內交資乘輶過里暨謝事屏退門
庭閒寂不以關說爲田宅資弟主政君治樞殁于京
師公在楚遣承役持尺符護喪諸屬吏無敢致賻弟
寄聲伯子國裳揭先世遺業盡畀其諸子比楚歸復
作室妥之距所居重十數武猶曰世世子孫無忘同

居意矣念贈公急追遠睦族則立宗祠置祀田衣食其族屬之貧者世父隱君格最爲贈公愛重公終身父之材其子賡引與李子同業已果領鄉書少年時師事僉憲莊先生視其子孫如骨肉歿而不替蓋用情之厚如此嘗自言平生所爲惟此念不欺始終一誠人咸信之以爲慥慥君子云永淳臨海人咸祠祀公聞公歿有自遠來哭者公所著尚書會解四書初說諸儒辨旨初東集訊讞稿觀風襍言字獄要語行于世公生嘉靖己丑年十二月十八日卒萬曆辛丑二月初四日得歲七十三配黃氏與公齊德封恭人

子三長國裳登己卯鄉進士榜名允棻今爲武義令
次允藻光祿寺監事次允藻邑庠生女三孫男五孫
女十三婚嫁皆名族黃生曰余握管從公後于時公
最稱穎脫余碌碌處囊中耳然公語余曰子器業詞
林品也將來上公車應制策又當先吾一鞭余蹉跎
謝不敏已而其言靡弗驗者不審公操何術所至甄
別群才若灼照數計亦復如是暨與公比肩交戟內
公恒出按部又出而司藩臬余旅進旅退伏巖岩之
日多特以知己故注目傾耳於公宦業悉其大者公
之葬也余以白衣冠會焉歸而合狀與誌叙次之俟

勒石于墓左銘曰張氏韞德世寵洪鍾爲人傑有二
龍厥最顯者曰長公明經篤行稱儒宗初携墨綬蒞
一同河潤百里棠陰濃徵書飛自建章宮柱後惠文
邇九重皂囊懇欵動帝聰埋輪都亭人避驄出蒞
外服總宣風汲黯涕泣顙亦憇臣也蹇蹇誼匪躬東
西南北命是從蜚英騰茂日昌融蜀道險巖自坦踪
人情荊棘忽蒙茸君子何病人不容猶非蠅點玷璜
琮飄然勇退卧蒿蓬羽儀朝野均寵綖一夜乘箕還
太空宰木方培馬鬣封詩以彰之永無窮

太學生陳君爾昭暨配許氏合葬墓誌銘

陳生栻榜將葬其父太學君于其邑西舍山之原君配許孺人合焉先期請銘於余而君從兄僉憲君爲之狀余夙知君誼不得辭乃按狀誌之曰君諱學潛字爾昭世郡之南安人曾祖庸祖閏父崑君生七歲就外傳而父歿母李孺人絕憐愛之然不以小慈弛課督也君亦勉自刻勵斷無涕母心稍壯爲郡學官弟子員則銳然奮曰大丈夫當游海內以成名柰何局趣守一室乎李孺人壯其志許之遂輸粟爲太學生得徧交海內英雋學廼日益長矣君治經生業顧

特酷嗜聲詩屬里中山人江一鯉千宗亮陳鷗黃克
晦與故令尹朱梧結為社時時分韻倡酬追蘭亭故
事君携筆研從焉又屬今司寇詹爾欽先生以侍御
編氓余自詞林養病歸乃益張吟壇狎賡和蓋余交
于君自茲始每扶筇鼓棹流觴刺燭君未嘗不振衣
步屨相左右後先也郡俗時薄賢生君負意氣盛不
少屈爲忌者所搆幾罹奇禍尋得解已諸山人相繼
殞郡中士大夫相與爲吟社益集君私謂余曰不佞
故青衿而謬與諸縉紳雁行時也驚弋在念將無郭
解我耶余笑曰郭解游公卿間以文辭耶君啞然失

笑然拱手謝不敏性不善飲興至輒亦引滿舉白陶
然倚榻卧醒輒盥面操觚短什長謳若弗經思而冷
冷有風致所爲詩具唱和集及一呖吟中君三世高
賢胥以儉勤世其業至君儉益甚布袍蔬食暑弗張
蓋曰吾留福以貽後人耳乃至款賓友調乏困則一
切豐腴不爲恡天性孝友事祖母暨母生盡志殫盡
哀喪葬悉軌于禮伯兄學海天有二孤又天童遺一
弱孫則善維護之俾底成立兩仲氏學淮學深又天
之嗣君以其次子與弟學源之子爲二昆後均其貲
飭蒸嘗伏臘蓋君自壯年持家政捍外侮跋履兩都

居恒覺紛瘁甚矣而術唐許家言者謂君豐貌銳首
非壽徵君亦頗用爲虞母喪襄事畢遂築室於母墳
之右隱焉擇冠芒屨周游林野與族子野叟譚桑麻
細碎事爲樂從兄僉憲君方葺祖塋修祠宇君悉力
佐之行吟餘暇間稍習外鍊內典諸書謝絕交游歲
抵郡城者不能三四余嘗謂君曰足下殆翩翩欲僊
乎君曰修短有數世豈有僊人聊託茲習靜卻疾耳
君生嘉靖辛丑卒萬曆壬辰得歲五十有二配許氏
長沙知府許自新女事姑孝相夫子勤綜門戶賦役
祭祀燕享咸斬斬有條理君出游太學得無內顧憂

此卒君難其繼不再娶子男二長栻邑庠生次榜乙酉舉人今為學淮後許出君曩與余輩游忘者或目攝君每應畿闈試則竊指曰是應詩賦科往矣頃歲諸邑子乃益攻古文詞為詩歌即謂君倡之其奚不可海內驚竒士邇譚黃白鉛汞者浸衆顧誕幻不可即君獨託為習靜夫修短有數君豫言之矣銘曰謂詩能窮人而君遇已窮謂靜能壽人而君壽不隆不盡之享綿爾後祉其將豐

贈奉政大夫前南京詹事府主簿南屏陳公暨
配徐宜人繼配傅太宜人墓誌銘

南屏陳公浙之餘姚人其官南京詹事府主簿以祖
大司空公任子恩也蓋昔蕭育馮野王咸起家任子
著聲績于朝廊郡國間輝映後先光昭史冊以大司
空名德方諸蕭太傅馮勲卿實相頡頏即官詹公之
砥行服官詎寧下蕭馮二子顧竟貴志終一命儻所
謂天道非耶乃一傳而有郡丞先生再傳而有潘叅
都諫君識者謂報施今不爽矣公與徐傅二宜人葬
有日而墓銘猶闕潘叅使君貽其尊甫郡丞先生所

爲狀屬銘黃生黃生非能文者而喜譚名家世德爰
不辭而誌之曰公諱孟愷字子教陳之先出陳高帝
隋并江南分置諸陳有諱昌者徙居上虞之小穴傳
至諱仁者徙餘姚夏少里又傳至宋武功大夫昇之
孫臯徙眉山公六世祖信高祖願皆以大司空公雍
貴贈工部侍郎兼都察院右僉都御史司空公生徵
仕公文斐公即徵仕公叔子也性剴直端凝司空公
蚤器之會以採木功當授蔭而徵仕公有夙疾遂移
蔭于公時公年甫及舞象未幾而徵仕公卒于杭公
擗踊迎喪歸哀毀甚母毛孺人泣諭公曰而祖貽謀

而父菴積咸屬于爾躬盍重自愛以圖似續公乃銜
哀茹泣朝于几筵夕于書史儼若侍祖父前也越二
載而司空公解綬歸時借公自慰曰與硯之人猶在
升卿之字匪虛吾兒爲不亡矣既免喪而娶徐孺人
爲郡博德輝公孫女陳徐故世姁司空公嘗從郡博
受業以故二氏之睦埒于潘楊而徐孺人以女德聲
族邨中是子是女之婚棟家者尤屬意焉自于歸而
上奉尊嫜下督臧獲咸秩秩中法程又躬操作其澹
素門以内翕然稱之公念祖父責成至意乃買舟携
篋詣北雍函丈鍵戶下帷匪名士弗與交人謂公志

趣蓋符融仇覽兼而參焉試棘闈弗偶旅邸蕭然徐
宜人治女紅絲絮爲薪水資閱三載乃旋里公弟弟
六伯氏爲家督公佐之庭闈間訢訢如也而又甚肅
已而伯仲俱宦游公獨與徐宜人昕夕侍養調飴味
鼎最當祖父歡當司空公九十之年 肅皇帝俞禮
官請遣臺臣式廬存問自中丞監司而下筐篚餽牽
犇湊旁午公黽勉代酬之或修赫蹏或躬謁謝皆并
井有條若分身而應者人謂司空公貽謀遠矣踰年
而母毛孺人卒又踰年而司空公卒公居喪哀慕一
如曩喪父時痛稍定乃匍匐北上請司空公卹典間

關數千里不辭勞瘁然而青雲之志灰矣是時郡丞
先生已有士林譽公謂司空公治二戴禮本外氏郡
博公而舅氏世傳其業乃率郡丞先生問業于桐木
湖與同居起者數年口述手示凜若嚴師徐孺人實
斥簪珥以供廩餼公欣然自喜曰吾家箕裘有託矣
奚必吾身遂謁銓得南詹事府主簿南故散曹而詹
署中非涼特甚公與徐孺人怡怡安之曰此養德養
身地也捐世味娛簡冊日與呂太史懷吳太史某質
辨上下退而抱寂食貧甚適也既而徐孺人病不起
諸孤羈羈公旦夕繫念比繼室傳太宜人來歸矩矱

秩然撫諸孤恩意備至公乃益安于官先後居留都
幾七載不遷而遽以病瘖逝交遊咸悼惜之方公疾
革時顧謂郡丞先生曰爾足亢宗爾母足抗節吾目
瞑矣傳太宜人號慟幾隕已乃強生爲宗枋計居恒
屏處一室惟機杼織紵是營家人罕覩其面有女一
適邵生圭蓋遺腹所產者圭迎太宜人太宜人亦謝
弗往也益扃戶綜核內政如初家故清白田不滿頃
屋不連楹兩幼兒當行經師脩又連舉婚媾太宜人
以子身肩之重而獲濟郡丞先生雖舉于鄉屢躋春
官家益窘無宿春糧於是奉太宜人命謁銓得令永

新太宜人就養宦邸猶諄諄囑之曰兒仕即為貧顧
食其祿則當圖其報勿第以祿養為吾願郡丞先生
自為令而貳守皆茹蘗餐冰以清白承先遺後遵太
宜人訓也初公之從父某夭弗嗣公仲子三策當序
及公與徐孺人力卻之曰兒未離襁褓忍與為人後
乎即千金厚貲於我何有竟以司空公命弗敢辭然
絕不關其貲產徐孺人猶終身邑邑以不能率卻之
為恨公既歿家業蕭條傳太宜人與藐諸孤形影相
弔無幾微見顏面嫻鄙中倅以橫逆加太宜人謂郡
丞先生第忍之慎勿與較而反稽之釁輒阻蓋公與

兩宜人之見大類如此公子男四三省即郡丞先生
三策聰選官三德俱徐宜人出女一適順天辛卯舉
人邵圭今任廣德守傳太宜人出夫姚江稱世德者
必曰陳氏司空公敷歷四朝聲實崇顯巖居壽考以
恩禮始終屹然盛矣中經式微宮詹公宦不遂然行
業足嗣家聲昔漢詔稱馮野王曰堅固無欲公殆似
之蕭育一豪男子耳未足方也天將昌陳氏胤徐宜
人以令德翼其範傳太宜人以苦節代其成即蕭
馮二子能得之於其身乃所得之子若孫者尤遠不
逮天道之挹損衷矣銘曰黎山磅礴鍾為宿海河源

涓焉群派斯滙蘭滋九畹衡正齊之映日凌霜無不
宜之源盎流長根培葉茂餘潤遺芳式昌厥後謂天
膏膏實乃昭昭勒詞幽壤永揭芳標

廣東按察司副使立宇杜公墓誌銘

觀察大夫立宇杜公之葬也封君塘山翁屬銘於黃生公之倩銓部潘君介紹以請狀則銓部君所手勒也而儀曹駱君爲之傳余與觀察公締筆研交又仕嘗同朝即微狀與傳知公悉矣公諱業字道修晉江四十六都朋山之鳳棲里人也朋山爲郡望嶽其山川磅礴風氣奧衍居人今稱二杜焉公先世以隱德聞逮今封翁始課公學竟以公貴累封奉訓大夫戶部員外郎而門閥燁然爲里中冠矣公初修藝巖壑中一出而與郡士角其詞呐呐其步蹢蹢若弗敢前

者然郡士則咸欽衽讓公公既籍諸生遂以其秋領鄉薦蓋歲嘉靖戊午也自是蹶春官者五時公猶富春秋獨念二尊人老矣宜一及時鄉用以遂膝下懽乃謁銓爲梧州司理梧兩粵劇郡也公慎茲爽愷又最爲上官賞識諸獄情之微曖難明糾紛靡決者咸檄公訊之公聽辭稽貌主以敬忌期于審克往往用片言折兩造即累歲滯獄公一鞠立剖之諸所平反甚衆民之自謂不冤者不止蒼梧四境內而已郡故開府權場設焉當事者復以屬公公竦然曰夫權猶脂膩也染之則汚人汚者復思染焉此其持衡在我

隄防在羣下矣爰乃堙弊竇嚴勾稽而澡身爲之倡
商有挾貲闌出者貴勢人爲營解甚力公力持之無
所假貸以故姦鑄室塞軍興倚辦獨饒制府公嘗語
人曰杜司理能爲疆場興利者以無所利故也居梧
三載餘臺使尉薦者屢矣以子立寡援重擢理順天
輦轂下獄訟蝟集貴戚宦近又多所請寄公凜凜持
三尺其理之一如理梧州時於是秋曹棘署咸知有
杜司理云以歲閱遷主政戶曹亡何奉母某安人諱
奔歸服除赴銓主政戶曹如故尋出督淮安庾事時
督庾者無董樞舟諸偷鼠伏烏攫盤據日久公一切

繩以法其根株窟穴從几上騷除靡或遁者自是更無私耗權無漏卮羣小悵然側目謗弋起矣比竣事還朝再遷爲郎中旋擢廣左臬副備兵瓊海兼督學乃同事者與公不相能乘癸巳大計齟齬公公竟坐前事報罷時公蒞瓊海南半期耳方添設土着謹清野之令峻通夷之禁屹然爲海上長城時時進博士諸生課以大學衍義之業曰此而鄉所標爲先進者也博士諸生灑然響應景附矣顧未久遽釋去士民翕然思之公既抵里而封君倚門迎公笑曰吾方築室鑿池雜時蔬果花木將以娛老今與兒共之回視

暴渡海凌波旋風飄泊時景象不猶愈乎蓋庭闈間
怡然甚適也居逾年而公歿公事封君至孝稍值志
愠輒長跼請罪其承顏養志迄于華顛不少衰居官
俸入悉推以均分諸弟弟無祿而撫弟之子猶已子
也性尤慷慨尚義宗黨姻舊宴且貧者羈旅者婚字
者皆倚公爲外藏有邑子客亡於淮弗克歸公徬徨
捐金治殯殮卒歸其櫬里人至今頌德先後敷歷中
外凡二十餘載皆甘寂守拙不闢捷徑不虞機穽當
理順天時王恭質公以戶曹郎抗疏譏切權相諸奸
黨伺之甚密公連日過從弗引避比斥去則携壺觴

遠餞之郊恭質公語公曰君不虞波及耶而是時余
方典 帝制恭質公所得 覃恩制詞實屬不佞視
草烏余旋幾爲峻人所穽恭質公非溢慮也蓋銓部
君狀君溫而莊直而不倨真懇而無它腸此足以際
公平生已公子疇芳卜獎公于某都弼佐山之原銘
曰計偕之彥老侍一第公厄禮闈壯而用世偉豎賢
勞終焉蹕屬彼得雋者於公寡儷利達之士老死一
官公望六袞已賦考槃宦游非巧萊綵爲懽彼諧人
者遺公以安內洽家庭外乎里黨人無間言其德不
與公雖往矣餘風可想子孫繩繩百世攸倣

無錫邑丞徐公墓誌銘

無錫丞徐公以萬曆己丑年七月十三日卒于官今
其子某等卜葬公于某山之原先期來請銘憶嘉靖
乙卯余童丱就棘闈試與公比席公覩余文嘖嘖嗟
賞曰真一日千里才也今不啻以名下識子矣公官
鴻臚時余守詞苑比余官白下公以部運至歲時相
聞問不絕己丑春余應召北上夜過錫山屬風利不
得泊公馳一介追及余于潤州曾未幾聞公訃矣死
生之感愴然在念而司銓大夫蔡君所爲狀又足信
也乃按狀序之曰公諱用賓字子尚其先光州固始

人唐乾寧中祖學士公實徙于莆元末有從莆徙漳者傳玄生春國初始入泉家晉江浯渡傳至封君毓毓生榮登嘉靖壬辰進士由嘉善令擢南京刑部主事以骭骸迂時卒官趙府左長史即公父也公少有異稟弱冠補郡弟子員下帷博習沉酣六籍子史而尤酷嗜左氏每試督學輒爲諸生冠試棘闈入彀而竟見遺者三公弗爲挫銳也復携篋游太學太學諸生又多歛衽讓公乃角藝畿闈又輒此公慨然曰士顧自堅何如耳彼入彀沈黎者不竟用察廉爲右職哉遂復應貲例授典客三載出爲攸縣簿簿職輸將

歲當督粲上留曹董區稅者齒例羨嘗公公厲色拒之曰夫官而賄也乃云例乎嘗公者縮頸去凡兩運一無所染長沙吳守憐公廉而瘁也屬值觀期擬丞代番休而借公署邑公懇辭曰行者代庖居者移擔恐忌端從茲啓耳太守心服其言公復督運如初又復無所染如前兩運用是廉能聲四起中丞臺御史臺若諸監司交口稱徐簿賢閱八載遷丞無錫無錫頻患歲惡亨轉者剽奪者相屬于途公典譏捕既嚴爲禁戢乃日設粥賑飢掩骼給樁皆捐俸濟之民呼曰徐父治譽隆隆起如治攸時顧甫四閱月而遽卒

縉紳士民哀思焉公天性惻怛言呐呐不出口一望
之知爲仁人長者長史公不祿封君年已及耆公旦
夕扶持最得膝下懽封君曰吾有吾孫猶吾子也仲
父無息公極意左右凡百以身肩之居罹回祿也代
而構諸叔母喪殯淺土也代而塋仲父曰吾有吾姪
猶吾子也弟甫孤善病公手湯熅殷勤備至女弟適
人者遭家中落公力爲推解至蔡氏妹蚤寡矢志四
十年間待舉火者七口飭衿襦遣其甥女二諸弟妹
曰吾有吾兄猶吾父也錦田某子甲者邂逅棘闥中
意氣來依公公廉其貧贈若錢穀聲已復告又復

厚贈之還其券不責償甲辰乙巳歲大侵饑

公脫粟貽餉自中春至中夏操瓢而仰呼庚癸者踵
相接夜出金錢施焉不令知施者姓名逮辛壬間家
計亦稍詘矣猶捐業賑貸如曩計先後所全活無算
宗黨戚閭勿論已公所謂好行其德者哉第令公黃
陂岩藪不沾一命其所濟於物渠寧淺渺矣公生某
年某月某日距其卒之年享壽若干娶某氏男某某
孫男若干人孫女若干人曾孫男若干人葬以某年
某月某日銘曰姜肱孝友劉翊好施是亦爲政奚必
撫仕仇香爲簿張玄爲丞官不厭卑蘄有令名振振

孫子握瑜懷瑾陽報雖嗇餘慶未憖